

重修兩淮鹽法志

兩淮鹽法志卷一百二

徵權門

減徵下

裁減楚岸浮費

道光十年十二月

欽差尙書王鼎侍郎寶興兩江總督陶澍會咨兩淮鹽政竊照楚西兩岸爲銷鹽處所非若揚州有辦貢辦公名目可以藉口見查商開成本漢口每引岸費至一兩三錢之多實屬岸商恣意冒濫自應裁減以節浮費查此等弊混漢口爲尤甚如口岸設店辛工飯食房租課力等項

本應各自經理又如會館經費惠濟桑梓等項均應自出己貲至過客酬應尤當各盡各情又如月包上下辦年下銷三分數二萬等名目尤屬荒謬亟應革除至津貼淹消火燬補運見經裁革此外救生紅船寺廟香燈更棚之類亦須大加刪減至管理鹽務衙門巡緝犒賞公費及緝私卡費查關薪水等項自不可少第宜予以限制大加刪減今酌於商鹽成本內每引給銀四錢以供應用責成鹽道分別應裁應減覈定條款數目詳明各院立案永遠不准加增所有江西岸費亦應專責鹽道一體裁減覈實查辦詳明

道光十一年二月湖廣總督盧坤奏臣每年應行查禁漢口浮費毋許各官需索陋規於年終取具漢商甘結彙奏一次自到任後查得道光十年分江南省咨送釐剔鹽務章程內有該岸商藉端公用恣意浮開每引捐至一兩三錢之事則是所具並無浮糜甘結亦屬虛應故事所有查禁漢岸浮費一節應請於核定案後切實嚴禁法在必行上年岸用既非情實應請無庸彙奏再岸費既已酌定每引捐銀四錢應卽確查漢岸向來用款分別釐剔此非一人之見所能釐定必須公正大員會同鹽道查辦方得減留允當兩江總督臣陶澍前有飭

委鎮江府知府王青蓮鹽經歷裴挺來楚會辦之舉現在尙未前來除咨催外合並陳明奉

旨報可

道光十一年五月兩江總督陶澍奏漢岸銷鹽居兩淮通綱之中引課最重無如岸商浮開費用恣意侵欺弊竇叢生水程一切漫無稽查以致腳私縱橫積滯引鹽前經臣會同王鼎寶興奏明刪減岸費而一切弊端尙須大加釐剔事極繁雜前接湖廣總督盧坤來信必須公正大員熟悉在場在岸兩地情形會同鹽道及委員查辦臣查江蘇道府各有本任公事並無候補人員亦無

硃批覽

熟悉鹽務之人惟有降調道員王鳳生曾署兩淮運司
深悉漢岸情形前經奏准暫留兩淮幫辦鹽務堪以委
令酌帶委員赴楚會辦以清積弊奉

道光十一年十一月湖北鹽道會同王鳳生詳議清冊一
漢岸首重鹽價貴則病民賤則虧商今浮費已經核定
漢岸雖奏定每引四錢緝私經費一錢然引數到岸多
寡難定自應如該商所議按引磨派以昭公允嗣後科
則或有增減場鹽或有貴賤應由兩淮運司隨時查明
稟請憲示辦理至現賣鹽價應請飭派在岸之揚商會

同漢商按月開摺呈報各衙門查考一漢岸公費前經奏明每引繳銀四錢原爲當事各衙門辦公及緝私卡費查關薪水等項之用今擬楚省兩大憲及藩臬司衙門公費歸鹽道按月解交其府廳以下仍由商人按月呈送不計閏不預支卽官有更替而費不重出再前定庫平核計引費不敷支解請卽在於原定數內按照市平提出一成作爲外費其餘均照九三平給發至調卹桑梓一條開至十餘萬兩之多又有月包歲敬三分數二八項三一五各節月包各名目數亦不下八九萬兩每名有開至千兩以上者不特顯乖調卹窮乏之意而

鹺務如此疲敝餉項尙無以應解豈能專任此等私立
條款之費況冊內所載非岸商之假託卽地棍之冒名
自應遵前奏革除但留桑梓一條亦不得過原定三萬
之數卽續有真正乏商之裔不能裁汰者見據商人情
願另捐銀一萬二千餘兩以全商誼而資津貼統計桑
梓項下四萬二千餘兩儘數均勻減給倘敢不遵或投
稟爭添卽將冊內之名革除永遠不准增入見將核定
姓名銀數冊發交岸商轉傳桑頭查明編號另造清冊
二本並用鹽道印信一存署備查一發商收存查考並
做道署三節給發商裔之例按名挨號給以執照質押

銀兩查出註銷仍治以應得之罪倘有失落者卽行扣
除不准補給免致日後糾纏今查湖南北額行七十七
萬九千九百二十六引計岸費項下每引四錢該庫紋
銀三十一萬一千九百七十兩四錢衙門辦公合庫紋
銀二十一萬八千八百五十四兩三錢各衙門書役經
費合庫紋一千一百八十四兩七錢三分五釐五毫月
鹽合庫紋一千八百五十兩二分五釐本署雜項合庫
紋八百九十八兩一錢七分五釐又書役合庫紋三千
四百三十一兩一分七釐公項庫紋五兩九錢義舉合
庫紋七百六十三兩一錢八分六釐五毫揚岸商辦公

合庫紋七千二百四十兩調卹桑梓合庫紋二萬七千一百五十兩除夕彈壓合庫紋二百六十五兩三錢四分六釐共庫紋銀二十七萬二百七十一兩三錢一分五釐除用該餘銀四萬一千六百九十九兩八分五釐又緝私項下每引一錢該庫紋銀七萬七千九百九十二兩六錢緝私合庫紋五萬八千五十八兩八錢五釐續入緝私合庫紋一萬一千一百二兩三錢南程公所合庫紋九百一十一兩三錢三分五釐北程公所合庫紋七百五十四兩七錢七分共庫紋七萬八百二十七兩二錢一分除用仍餘銀七千一百六十五兩三錢九分

以上湖南北兩省岸費計庫紋銀三十一萬一千九百七十兩四錢又緝私項下該庫紋銀七萬七千九百九十二兩六錢二共庫平紋銀三十八萬九千九百六十三兩內除岸費支銷庫紋二十七萬二百七十一兩三錢一分五釐又緝私支銷庫紋七萬八百二十七兩二錢一分仍餘庫紋銀四萬八千八百六十四兩四錢七分五釐應請自本年冬季起飭商按月繳存道庫作爲辦公不時之用嗣後或於水旱偏災或荆襄修築隄工或隆冬煮粥施散棉衣或巡江賞號或緝私獎賞各項緊要之需由鹽道詳候批示動用此外概不准由鹽道

濫支亦不准岸商拖欠

道光十二年四月鹽政陶澍札經厯司裴挺等照得楚岸公費核定每引祇准四錢永爲限制茲聞上年岸費仍逾四錢之數總由不肖岸商借題浮冒交結官場合札飭發鎖封赴楚稟知鹽道將辛卯年楚岸帳簿查提封固並將岸商鎖拏押解來轅審辦參追旋於八月鹽道稟已摘提岸商包大興包元泰支允祥黃正泰交委員管帶起程其尉躋美和福盛二商先已帶帳赴揚經鹽政批交運司審詳又據北鹽道另詳訊據岸商黃正泰等同供漢岸用帳前經詳定每引四錢又緝私一錢每

年應支銀三十八萬九千餘兩商等至十一年十月中旬始奉諭知其時已屆冬季所有春夏秋三季岸費在彼時業已支用俱照舊章辦理迨奉文以後通年統計以致有九十萬兩除去水災十一萬兩春夏秋三季支用均在新章未定以前卽冬季按照新章銀數尙有多用悉皆自出己資情願赴揚候審見交裴挺於本月初十日起程赴揚并請嗣後擬令各商凡一切岸用豫先將何項係何月分銀數若干并出具無多支濫應切結稟道核明後方准動支如不豫結除不入帳外仍提該月商究處

道光十二年十二月運司俞德淵詳奉委審據岸商供認
上年辛卯岸費浮用銀四十餘萬兩查閱所呈岸帳三
本就北鹽道衙門一處季規重疊另有按季鋪墊到任
禮填衙禮壽禮節禮幕友節禮甚至門籤管廚跟班三
小子亦皆有季規節規統計已有十數萬兩另有逐月
月帳內零星之款在外再查賙卹桑梓一款核定二萬
七千餘兩今帳開仍支用岸費六萬六千餘兩另有月
帳節帳內零星花名及月包等款在外又帳開漢陽府
四季一萬六千兩又開有鹽道每節送江南禮差丁盤
川一百六十八兩三小子道差三十二兩六錢嗣北鹽

道稟辛卯年岸帳內如襄陽緝私京口長隄息銀育嬰堂救生船八九十年等款雖非是年應支之項實係該商應繳之銀不得謂之冒濫其二月分載有裕道門丁取銀六十兩一條查職護道其時在都何以有取銀之事又如帳載武昌衙門公費每季三千兩此係虛數六折扣算實止每季一千八百兩上年減定亦復如是另補上年一千七百兩一條則並無其事卽辛卯夏季在護道任內公費並無額外公費亦無幕友節禮及門簪管廚跟班三小子得受季規之事又如雜款內載有多條不知其是何用項非令該商等一一指出礙難懸擬

嗣於十四年二月湖廣總督訥爾經額奏據經手岸商
傅樅等供商等係於道光十一年十月十六日奉到減
定規費章程其未奉行知以前何款應裁何款應減伊
等不能懸定仍係查照舊章應付且是年江水漫溢漢
口地方均被淹浸該商等遷移避水修復沖塌店屋及
公捐助賑等格外賙卹桑梓一切零星款項不無稍多
因章程甫定不能驟減亦有酌量給發之項查辛卯年
未定章程以前所用之項與往年比較實屬不相上下
並無浮濫惟因災多用及照新定章程酌量增給各項
未於事前知會淮商見在照依新舊章程核計實多用

銀六萬八千餘兩情願按店擬賠卽於淮南應給辛工等項分年坐扣歸還應免置議惟查漢岸規費雖非帑項實關商本支用一有浮濫則商力困乏必致欠課誤運且恐其於鹽價取盈有妨民食見旣明立章程惟當永遠奉行此後如有在官胥役以及乏商鹽蠹敢於需索譌詐准該岸商隨時指名控究倘敢甘心隱忍或希圖舞弊濟私以財營求則係彼此俱罪之贓別經發覺卽應照律治罪不能以浮開濫應爲詞曲爲寬貸統計年額總不得逾奏定每引捐銀四錢之數倘遇有災賑隄工地方要務必須藉資商力或商情願捐輸應由淮

商岸商呈明運司鹽道通詳江楚督撫衙門立案以免
藉端影射

道光十五年二月鹽政陶澍奏伏查御史許球以臣革除
浮費奏繳養廉五千兩而於本衙門緝私賞號僅裁四
成此項卽係月費計算仍有銀五萬餘兩緝私款費通
綱已徵三十萬兩此款無可支銷且屢次所奏均未聲
明款目謂爲取巧含混臣力裁浮費而獨留本衙門之
浮費以供指摘之口以共見共聞之賞號列諸章奏而
又匿其數目臣雖至愚極淺尙不至是所以然者養廉
與浮費不同浮費與月費亦異而奏摺與簿冊亦有體

裁詳畧之分前經奏明各衙門公費及運司鹽政轄下書役辛工紙飯並乏商月摺等每年共需銀八十餘萬兩應分別大加刪減其應領實存之款亦酌減十分之四五不准商人溢領私增此卽裁革浮費之原奏有總數而無細數挈領提綱蓋奏摺之體然也迨臣接任鹽篆恭繳養廉緣養廉例不兼支前此浙江鹽政改歸巡撫管理卽經撫臣帥承瀛恭繳養廉事同一例至鹽政旣裁一切浮冗之處均應裁汰惟衙門雖裁辦事如舊仍有不能一例全刪者分別應裁應減應併應留因款目太繁實未便逐款計數瑣屑瀆陳亦奏摺之體則宜

然所以殊於簿冊也所云裁減四成者不止於緝私賞
號一款所未聲敘數目者亦不止於緝私賞號一款乃
該御史於均經裁減四成之中獨摘此一款於各款分
別裁留酌減之中亦獨摘此一款謂臣屢次所奏從未
聲敘數目查臣原奏內所敘款目甚多卽吏役辛工飯
食已不勝覲縷如巡捕匠作酬酢結彩涼篷聯額作坊
坐船浴堂橋旂撲毬掉轎裝演等項卽向所稱四十七
款之類若不聲敘數目以爲原款若干裁減若干竊恐
連篇累牘悉數難終臣果辭少取多則如所裁酬酢一
款卽係鹽院衙門應酬之用每年六萬兩爲數豈不更

多何以裁之而不留又如革總督賞號二萬兩爲數亦不少同在一摺有數可查該御史又何以匿之不言而但舉養廉之五千兩以相形且臣於養廉一摺縷陳裁減款目此外並未另有緝私賞號裁減四成之摺而該御史以爲屢次所奏從未聲敘憑空結撰而反以臣爲含混取巧乎查從前鹽務辦貢辦公本有例用七十萬兩而又有辦公不敷一款攤徵數十萬不等甚至一到任費亦開銷至十萬有餘自新章旣定裁去辦公不敷一款卽例支七十萬亦減去過半每年辦貢辦公止需銀三十餘萬而該御史乃謂緝私款費每綱例徵銀三

十萬此款無可支銷是不知款費之與賞號本係兩項
款費爲委巡員弁兵役薪水之用按日按勞由運司支
發每年亦止十餘萬兩並無三十萬之數而緝私賞號
則臨時鼓勵之用存六裁四頻年查緝私匪破獲之案
不下數十起卽糧船夾帶蘆私亦按段嚴行搜查自黃
林莊入境渡黃越淮節節均有巡緝自揚關以逮蕪湖
處處皆有搜查餘如下河海濱洪湖等處屢有拏獲梟
匪巨案皆以此項用爲鼓勵並分撥災區及地方緊要
公務如揚州江甯儀徵等處連年捐卹煮賑動以萬計
經運司委員解送亦有札司就近逕發具報者皆有衙

門案卷可查計每年仍賸銀二三萬兩存於司庫並無
用至五萬餘兩之時每有存餘卽留充下年之用用有
積存卽暫停徵帶如癸巳一綱不徵緝私經費甲午一
綱不徵緝私賞號皆因存有餘賸卽不列徵節年科則
刊行萬目共覩豈容含混若漢岸浮費前因岸商呈出
帳簿牽涉衙門甚多提質來揚與商人面質無此政體
且移少就多移遠就近乃辦案之常例是以請交湖廣
督臣就近提審該御史以爲授以彌縫之隙是又因臣
而侵及湖廣督臣不亦過乎

奉
恭載

上諭一道
制詔門

裁減西岸浮費

七百兩應留存

籌備鹽道衙門賞犒公費銀四萬兩九兌實銀三萬六千兩此款查職道衙門每年養廉銀三千兩除去應捐津貼南贛緝捕經費二千兩加以零星捐款除贍不及千兩不敷辦公擬照兩淮巡緝賞費減四存六之式裁銀一萬一千四百兩仍存銀二萬一千六百兩

南昌府公費實銀三千三百二十兩南昌縣煮賑及巡緝公費實銀四千二百七十兩新建縣煮賑及巡緝公費實銀二千二百七十兩星子縣巡緝公費銀一千一百兩共一萬九百六十兩此款每處均在千兩以上擬

減三存七裁去三千二百八十八兩實存七千六百七十二兩

南康府公費實銀六百九十兩擬減二存八裁去一百三十八兩實銀五百五十二兩

南昌府同知通判及藩臬司府縣首領佐雜公費實銀一千六百三十兩此款每處分支無多應全留

文武各衙門書吏兵役飯食以及刊刻定例告示紙張工料等實銀一萬二百六十兩擬一概減二存八裁去銀二千五十二兩實存銀八千二百八兩

修理庫樞檔房等項實銀一千五百兩擬減二成銀三

百兩仍存銀一千二百兩

黃岡洞卡兵食鹽折價二百四十兩係歸入鹽規報部之項仍應存留

建昌府設店減價敵私津貼鹽價及店內辛工火足等項每年約二萬八九千兩此款查向來建店籤商輪辦值年之人恃津貼鹽價店係由各商公辦往往任意浮開實屬虛糜前已飭令將建店歸省岸七商公辦費亦公攤今擬店用每年以四千兩爲率其貼價每引五兩零照向來銷數酌中每年作銀一萬二千兩仍隨時查察照實銷鹽數核給如有餘賸留備暢銷時津貼不敷

之用共計裁銀一萬四千兩存銀一萬五千兩

津貼淹消補運銀三千五百八十七兩查新定章程毋庸津貼應行全裁

活支無定款銀一萬七千七百兩此款款目繁多如梅家洲緝私及委員公幹見在攸鎮等處勘丈地界之類今擬減四存六裁銀七千八十兩存銀一萬六百二十兩隨時支銷餘仍歸公

青山店提駁挂號照票司事辛工等銀八千一百兩公共鹽倉碼頭修理工料等費銀七千六百兩公共鹽倉司事辛工以及看鹽倉柵欄更蓬夜巡油燭等項九千

二百兩三款共銀二萬四千九百兩查前三項在所必需似應准其開銷惟原用過多應減半裁銀一萬二千四百五十兩

寺廟香燈地方善舉共銀四千九百兩減四存六裁銀一千九百六十兩存銀二千九百四十兩

津貼寸金丹藥價銀六百五十兩減四存六裁銀二百六十兩存銀三百九十兩

徽西會館公用銀一千三百兩減半實存銀六百五十兩

省埠酬應各事每年約銀五千八百三十兩應全裁賑

卹桑梓資助貧老孤孀每年約銀一萬三千七百三十兩省埠店用辛工挑倉鋪墊銀三萬三千七百兩辦公各司事俸辛銀八千六百五十兩辦公人役工食賞項銀七百四十兩課船巡船信足工食銀二千九十兩公用零支每年約銀三千五百四十兩幫貼各商舟車衣履銀二千八百兩以上各款共銀六萬五千二百五十兩原應各商自行辦理未便開銷公項惟西岸賣商資本微薄值鹽務疲壞之後商力愈形敝乏今整飭伊始若再將省埠店用一切全行裁革未免辦理竭蹶轉恐別滋弊端擬裁銀四萬五千二百五十兩仍應存銀二

萬兩以資勻攤之用

通共原用岸費共銀三十萬九千九百六十七兩刪除銀十九萬九千二百九十五兩仍存岸費銀十一萬六百七十二兩

查江省每年額銷鹽二十七萬七千二百九十九引每引四錢扣算共該岸費銀十一萬九百十九兩六錢約可敷用有餘惟岸費之外尚有另用各款開列於後

一商捐繳庫核支緝私經費銀四萬兩九兌實銀三萬六千兩查江省與閩粵浙皖交界鄰私充斥兼之回空糧船私鹽夾帶占銷堵緝巡防最關緊要經費必不可

少應請全數存留仍隨時核實撙節支銷如有餘賸仍行存儲歸公但此款係緝私公用非岸費可比應另款開銷

一外籌各官卡弁商巡游巡船價賞犒等項每年約銀一萬五千五百十兩已據商捐繳庫核給又開銷外籌銀一萬一千五百有奇殊屬浮冒全裁

一每年另款捐繳鹽務充公銀二萬兩九兌實銀一萬八千兩原係捐備撫憲衙門緝私公用道光二年奉准充公爲見在每年支銷書院義倉義渡育嬰堂及巡查河道津貼南贛緝捕經費之用應於岸費之外另款作

正開銷

一各商墊繳匣費每年應貼月息銀一萬一千六百兩
因嘉慶十五年庚午綱起至道光十年庚寅綱止運庫
應解匣費銀兩有統銷展限未經徵收有已經徵收運
庫挪墊共欠解銀四十七萬有奇每年應支緊款歷經
各前道飭商墊繳共銀二十二萬有奇係借貸墊繳其
息銀據稟歷來賣價內攤派見在岸費既經定數勢不
能將此項銀兩列入惟屬因公墊繳責令岸商賠息未
免偏枯應請暫行照數另款核給俟將來徵收匣費解
江給還之後卽行停止以示體恤

以上四款共銀七萬七千一百十兩裁去一萬一千五百十兩實存銀六萬五千六百兩係必支之款應請另款開銷

道光十四年二月運司俞德淵詳江西岸鹽各商觀望不運推詢其故皆以岸費繁重成本虧折爲詞查歷年岸用道光十一年奉裁岸費計用銀二十九萬餘兩十二年計用三十九萬餘兩十三年所用岸費尙未據岸商開報聞仍係有增無減又從前懸墊岸費暗中攤帶不在此數應照楚岸章程遴委妥員一人前往西省隨同鹽道逐月稽查銷數嚴禁跌價搶售並壓放賒期等弊

其岸商酬應公費必須查照定章由各店公同議定方許出支如有隨同濫應或藉名冒銷者許委員稟知鹽道查究於月底將一月支銷銀數逐款開報揚商以憑隨時查核庶幾岸夥人等稍知顧忌等情經鹽政陶澍批准

道光十六年運司劉萬程詳近年絲價染工加昂商稟貢價不敷請將例辦三貢於原減數內加貼銀二千兩按三貢分成給領自戊戌年起仍照從前減定銀數給領嗣於十七年五月護運司姚瑩詳准丁酉年添備路貢二分尙在丁酉之內除應領銀六千九百六十餘兩外

其貢物染工絲價與三貢一例加昂不敷備辦請一例
加貼銀五百二十五兩八錢八釐又於十七年十月護
運司姚瑩詳十七年丁酉加給三貢貢價三千兩原經
聲明以後不得援請加增據商稟稱見在絲工各價較
前復更增昂請照丁酉酌加銀數給領備辦等情經鹽
政陶澍批准照丁酉銀數給領仍飭自己亥年起照前
減定銀數領辦斷不准再行援請加增十九年正月運
司沈拱辰詳各商承辦端陽

萬壽年節三大貢需用絲價較前騰貴所領價銀不敷備辦請
照市價酌增

謹按減徵一案初定數目皆王鼎寶興會同陶澍釐定其後隨時酌減仍師其意實爲淮鹺一大關鍵故備書其事厥後陸建瀛改行淮南票鹽奏陳新章十條首以減外費輕成本爲請值兵燹後案多佚失僅載其章奏於淮南改票篇其刪減細數姑從闕文之義俟後來者搜訪以備攷

兩淮鹽法志卷一百二

兩淮鹽法志

卷一百二

徵權門

減徵下

二

兩淮鹽法志卷一百三

徵權門

窩價

國初淮引加窩額課窩利往往運商墊繳康熙九年鹽政席特納疏陳兩淮積弊指爲淮南苦累之一然請引行鹽必以窩單爲據其結狀註明某商退運某商認運某綱起認運若干引由運司蓋印窩商數年一次向運署請給硃單是窩商卽運商明矣及其做也有窩之家不皆行運高擡價值往往倍蓰正課迨整頓鹺綱刪減窩價議定開綱時有窩之家如擡價居奇不願出賣淮運

商納課用本名請單辦運每引窩價一錢二分其後窩價停止票販盛行根窩之名遂除志窩價

道光十年十二月戶部尙書王鼎戶部侍郎寶興兩江總督陶澍會奏運商請行引鹽必先向有窩之家出價買單然後赴司納課通計淮鹽有根窩者一百五十二萬五千九百餘引其無根窩而自用本名請引者亦十六萬六千五百餘道足知引鹽原不須用窩單乃有窩之家輾轉私售如操市券以一紙虛根先正課而享厚利以致運商成本加重昂價病民應全行裁革惟念淮商受

國家參養已久亦如糧船之有旂丁姑准留此根名每引
每綱酌給銀一錢二分以示格外體恤如有把持希冀
增價卽追單繳毀永遠裁革嗣後請引祇按綱給單不
准預請數綱以杜牽混其各處口岸有虛名占據租雇
網利者查出一體裁革另籤殷商承辦以歸核實而輕
成本奉

旨均照所請行欽此

道光十一年二月署運司色卜精額詳淮南商人運鹽根
窩向來按綱請給硃單每引原定窩價一兩上年奉准
每引酌給一錢二分今查安慶池州太平三岸向來不

憑根窩硃單歷係另行給單辦運於該三岸內安慶每引另完窩價九錢九分池州太平每引另完窩價四錢九分五釐卽憑窩價完納手本驗給硃單其每綱其完銀七萬二千二百餘兩以爲貼補辛工欸內之用是以向來辛工本欸每引徵銀一錢八分原該徵銀二十三萬一千餘兩其每綱實徵銀十五萬八千餘兩因有安池太窩價之數貼補也今辛工一項已奉將浮糜堂費等欸裁除按照月摺之數減去十分之五每綱實徵辛工銀八萬四千二百餘兩見已另詳辦理外惟科則已減原可無須安慶池州太平另再完納窩價貼補但從

前綱岸窩價一兩安池太每引九錢九分及四錢九分
零今綱窩一錢二分安池太亦當遞數減完茲若全數
免徵則係向有窩價之岸改爲不完空給硃單似不足
以昭平允擬卽照一錢二分之數遞減徵納以抵補雜
欸有餘留充公用經鹽政陶澍批飭新任運司議詳嗣
據運司俞德淵詳安慶向來每引徵窩價九錢九分本
岸自完五錢九分四釐其餘三錢九分六釐派歸楚西
吉等岸引內帶完池州太平每引徵銀四錢九分五釐
均係本岸自完舊其徵銀七萬二千二百二十三兩四
錢七分撥抵辛工之用已無專徵名目歸於雜費項下

統徵第雜項用款極多仍恐有例外必須支用事件況
同一引鹽惟安池太獨無窩價口岸每引已定一錢二
分今無根窩口岸照徵窩價亦未便加重今議統照每
引一錢二分徵完按池太額引共九萬四千八百九十
七引一綱其徵銀一萬一千三百八十七兩六錢四分
專列一欵徵收歸於雜費項下動支並添入科則諭商
遵照經鹽政陶澍批准

道光十一年九月戶部議覆都察院左都御史白鎔江蘇
巡撫程祖洛會奏一摺查淮商認運引鹽各有一定引
地商人數年一次向運司核對各商花名底冊並引數

相符填寫硃單鈐印付與收執俾得請引辦理謂之根窩本商有將自執根窩請運者亦有分撥他商根窩請運者由來已久俱係外辦章程向不報部上年經臣王鼎等奏明每綱每引酌給銀一錢二分不准把持增價並令嗣後請引祇准按綱給單不得預請數綱在案今據白鎔等奏稱根窩之設原係各商認引行運滾總成綱俾免爭競而易稽考無如近今有窩之家不必行運將根窩輾轉售賣占私害公單價幾倍蓰於正課遂至買單行運之商成本加重鹽引滯銷實足爲害等語臣等查兩淮綱食引地各商認運商名從前商人但須執

窩向運司請單辦運毋須另行出價買單是窩商卽係
運商嗣因商力疲乏遂有將根窩出賣之事而固窩射
利之徒又復收單賣執無窩之商任商勒索一單之費
甚且倍於正課前經臣王鼎等酌減價值亦恐窩商昂
價賣單則買單行運之人必致成本日增今白鎔等以
近因有窩者不必行運而買窩者又非行運之人徒令
執窩見運之商互見告乏仍不足以杜流弊請嗣後有
窩之家卽令照窩行運不必官爲定價如本商不能行
運准其退售於新商特不准轉買於不行鹽之人從中
射利係爲嚴絕固窩以培商本起見應如所請辦理仍

請

勅下該督轉飭該運司於每年開綱時卽飭執根窩之商滾總
辦運以復舊規如窩商中有力難辦運之人准其退售
於新商自行認運毋庸官爲定價儻賣於不行鹽之人
從中射利昂價居奇卽應嚴行懲辦以除積弊其每年
開綱之後如官商並不投滾辦運又不退售於新商應
由該運司查明提窩改籤仍治以應得之罪俾不致貽
誤認運奉

旨允行

道光十二年二月運司俞德淵詳查滾運辛卯綱引前經

詳定以庚辰硃單戳用因開綱以來投滾寥寥嗣於緩納案內各商趕運一時無處覓單經署司籌議先以本名請運隨後另覓窩單旋奉札飭照十年冬底奏定章程以每引一錢二分計算繳庫執引赴岸銷售毋庸補繳窩單在案迄今僅據投滾八十餘萬引尙有二十餘萬引未據滾齊瞬屆一年未便再任延誤應遵照部議將未滾名引提窩改籤惟是引窩爲請給硃單之根據而硃單爲按綱辦運之要憑兩淮向係預請數綱硃單除見在辛卯戳用庚辰硃單之外尙有嘉慶十八年詳請開給之癸未甲申乙酉丙戌丁亥五綱並道光二年

11-22-1964

繳其預給之癸未硃單壬辰卽須戳用仍請於開綱時
嚴立限期催令趕緊滾總如有逾限不滾亦卽註銷示
懲至癸未等綱應行戳用之甲申等年硃單俱各照此
辦理統俟預給十綱硃單請訖遵照見奉部議令執窩
之商滾總辦運如窩商中有力難辦運之人准其退售
於新商不必官爲定價儻窩商並不滾運又不退售或
賣與不行鹽之人從中射利卽分別懲治提窩改籤俾
預給未用之癸巳等一綱硃單不致廢置而每屆開綱
時執單者亦不敢任意遲延有誤行運仍遵奏案嗣後
請引止准按綱給單永遠不准預給以杜牽混經鹽政

陶澍批根窩之說本近壟斷既不滾總行鹽私相售賣
硃單質賣亦從此脫化而出輾轉擡價居奇成本之重
以此運銷之滯以此官價昂而私鹽日熾亦以此本重
價昂私充課絀而鹽務遂一敗塗地亦以此如根窩可
以質錢行運則鹽務不致一敗塗地矣此中利弊不待
智者而後知也單從窩出仍藉典質居奇鹽行則坐享
其利鹽滯則一文不值幾見有質窩典單以行鹽者乎
流俗悠悠之口變亂黑白何所不至前定章程准給每
引一錢二分於滌弊除奸之中仍寓體恤不卽裁除實
爲天理人情之至後此旁觀不悉底理而輕徇俗情轉

欲聽其質賣不但爲鹽務之蠹而窩單亦頓成無用之物試思一綱滾總不前卽提窩改籤並後此硃單亦廢矣求如前此所議之每引一錢二分尙可得乎上年接到司詳本應卽行咨部定案姑念執窩執單之人數較多一旦全行裁革爲期大促且遠處執單之人或未盡悉是以姑緩以待試行今爲期又已一年畢竟辛卯之引是否全完所統之綱單其計若干仰卽詳查具報辦理至壬辰開綱業已半載有餘是否滾運全竣見在漢岸缺鹽萬分焦急務卽確查滾總若干勒限一月趲運前行其未滾之單其有若干卽行統單改籤以符部文

可也

道光三十年陸建瀛奏竊臣前奉

諭旨發下曹履泰摺片給閱當卽覆陳俟逐細推敲再行具奏
在案謹按原奏所稱從前兩淮設立根窩乃永遠行之
結收前人深知商人有利則趨無利則避是以立此窩
單爲把握既可杜有利時之紛爭又可防無利時之趨
避每遇辦運需銀時將窩單質借可以一紙定結借銀
千萬尙有短絀之商運司卽將該商窩單追繳改撥他
商是以引課從無虛懸等語查根窩果有如此之把握
則道光十年未裁根窩以前鹽務自應課充運暢何以

積欠至四十餘萬兩並虧帑本至七百餘萬兩之多且十載迭鈇四綱或以兩年行一年之鹽致煩

欽命臣王鼎臣寶興來江會同總督陶澍查辦蓋前此兩淮浮費浩大盡歸中飽一遇奏銷緊急則以帑本供其騰挪或彌殷富各商墊借待帑本挪用已空富商家資已罄束手無策而以帑利貼害後商自裁根窩裁浮費散輪規改北票楚西暢銷數年陶澍任內帶銷前任積引一綱代還前任帑利數百萬較之有根窩時兩年行一綱欠課千餘萬者孰盈孰絀顯而易見近年淮鹺復敝由於後人不守陶澍革弊章程而岸費日增不師陶澍散

輸大意而改行折運成本愈重愈不足以敵私行致挪
正墊雜庫儲空虛卽無水災火災亦萬無支持之理該
給事中請復窩單於敗壞決裂之日是猶久已倒閉之
銀店錢店欲持其空票令人行使荒缺多年之廢宅廢
田欲持舊契易人銀錢不待智者而知其難已况前左
都御史白鎔奏復窩單經部議准以來十餘年無人過
問可見人情之難強卽法令亦有時而窮今欲以此爲
整頓鹽務之策不幾同於畫餅充飢乎必謂商人有利
則趨無利則避故設此以防其去來無定不知鹺法本
屬貿易商之來去視乎利之有無設任其事者一任屬

員幕友家丁吏胥游客刁衿土棍人等時時剝削誅求
商本旣虧禁之不去亦救死而恐不贍矣又片奏淮南
之滯銷由淮北票鹽之侵灌請將北票提出三十萬引
配入南鹽每商請運南鹽千引者配行淮北票鹽三百
引不但可以調劑南商且可防北販有利則來無利則
去等語查淮南受侵果有由北票則道光初年淮北未
改票以前淮南卽應暢銷足額何以一蹙而遂不振其
時淮南又受何鹽侵灌耶且淮北額鹽三十餘萬引未
改票法之先每年僅捆運二萬引不及額銷十分之一
全爲蘆私場私所占見在票鹽每年行四十六萬引係

恢復從前蘆私場私所占之引地若謂占侵淮南則此
四十六萬引安能偏及中州楚西百數十萬引地耶況
北票每引運至王營西壩成本已及四兩加以過湖水
腳一兩到岸水腳一兩以上票鹽至淮南交界成本亦
需六兩不止四兩之價見奏淮南新章盡裁浮費攤輕
科則南鹽每引到中州楚西等岸成本亦至七八兩並
無十二兩之價且北鹽六兩者每引四百斤南鹽七八
兩者每引六百斤彼此攤平輕重適均南固不至侵北
北亦不至侵南商販納課請運願南願北聽其自便若
如該給事中所奏意在調劑南商而北商必自瓦解南

商之有利與否尙屬未定北商之一去不返實可預知如欲借此添入根窩增加成本使利不歸於納課請運之商而歸於空紙壟斷之輩則正臣所謂今日大弊利不歸

國亦不歸下而盡歸於中飽之人者也總之窩單不能復卽復亦終資奸商之把持而運必不充課總不足北票不能融卽融亦徒壞淮北之成法而北既有損南仍無益與臣所議裁費以輕本輕本以敵私如柄鑿之不相入未敢輕定採擇也奉

硃批知道了欽此

兩淮鹽法志卷一百三

兩淮鹽法志卷一百三

徵權門 竊價

兩淮鹽法志卷一百四

徵權門

驗貲

道光閒淮北改行票鹽業此者獲利頗厚豪右豔妒爭操空券以漁利詭立名字虛占引號於是設驗貲之法以紂之是時海內猶富淮北歲課不及百萬而挾貲者歲幾千萬勢不能徧及乃按貲折扣以給引蓋什分而得一二耳軍興餉鹽盛行票法大壞同治三年曾國藩整飭淮鹺北鹽復暢爭利者蠡起商多額少平準爲難於是復行驗貲之法而流弊究難盡泯行不數年卽議

停止乃仿淮南循環給運法窮則變變則通蓋當局者亦幾費躊躇矣志驗貲

道光十四年十一月運司俞德淵詳查票販請運未有不挾貲而來儻不持一文皆可挂號則不難以一人而詭託多名若並不行一引而空上數百之籤不但得號轉賣流弊甚多而且實在請運之籤因之阻滯計惟有先令驗貲以杜空挂之弊但自挂號以至掣籤其事甚繁卽趕辦亦須多日以每次掣籤八萬餘引計算共合錢糧經費十數萬兩再加空籤數倍卽是數十萬兩旣難歸庫無可收存且掣空則原貲發還儻每次掣空每次

發還亦無以服票販之心而事非一人經理銀又收存
多日更難保無疏虞頂換應請由分司收齊手本註冊
發場由場官收稅當時填給收銀小票以爲執據分司
俟每次錢糧經費若干解庫齊全然後定期總辦分司
會同各官公座憑籤派定垣名張榜曉諭該販卽以場
官小票赴局填換局票臨當捆運之時由場官填給大
票開行經鹽政陶澍批准

謹按此爲淮北驗貨之始

道光十六年二月護運司姚瑩詳據署海分司謝令元淮
稟稱查三場本池俱遵憲發章程將錢糧經費鹽價先

行完納然後派垣捆運其板浦場西臨局四疇中正場
花垛局四疇客池照青口之例驗貨挂號民販赴分司
衙門自具手本載明姓名籍貫年貌請運某場某局鹽
若干號將錢糧經費完納分司給與每號一百引收鹽
小票赴所請場局呈驗並將鹽價交與局員局商眼同
團長收存局中隨時給價買鹽其存局鹽價鹽販不過
百引以防虧欠局設各池垣名籤桶一箇票販自行掣
定何垣卽於收鹽小票上註明親往所掣之垣協同團
長巡役稽埽由局另發循環二簿逐日按數登簿報局
以挂號之先後爲收鹽之次第如在前之販一日不到

此日之鹽不准攤分三日不到准挨次之號接收每人一號百引齊心分稽俟團鹽足數稟局捆包後將收鹽小票送分司衙門換領大票掣驗截角出場運銷等情本司查板中二場客池既請驗貨挂號自應以挂號之先後爲收鹽之次第俟捆包後再將收鹽小票繳銷換領大票以資稽考經鹽政陶澍批照議辦理

道光十七年二月海州分司童濂稟淮北票鹽錢糧前當試行之初票販貲本無多且係前後到場是以隨到隨上錢糧收足而止卽有後到票販買鹽不獲而錢糧既已足額票販亦無可藉口見今數年以來人心踊躍票

貨每歲加增多至數百萬兩統於開局之前既已全數到場無從分別先後若任聽同時擁擠爭先完納不但不成政體亦且紛擾大局勢不能不先令掛號但當此鹽少貨多票販皆知掛號之後不能不有折扣因於貨本之外空開銀數冀以空開之數多占折扣之額兼有白手棍徒並無一引之資空挂數千百引因以空挂之號重價轉賣無可限制此外更有並非辦鹽票販挾其勢力專事求號一有不足則以怨毒而造浮言場下似此甚多亦屬有關大局是以不得不出於驗貨一法先令票販各以所攜之貨於開局之前遵照示定日期當

堂驗明注冊因照注冊驗明之貨統計總數通攤派買
但見今數百萬兩之貨非一日所能驗畢而驗畢發還
之貨卽不難更番遞驗仍是無從查實如遽將驗過之
貨分次全數收庫則不但分司責成過重且非票販與
分司平時誠信相孚亦未能遽議及此再四籌酌擬請
於開局之前示定驗貨日期會同總辦委員督同場局
各員分作五處同日驗貨則一日卽可驗畢當日卽可
發還分司之責成旣輕亦不至有挂號空本因照各局
分驗銀數合之各局派賣鹽數如其數適相符則仍是
隨到隨上錢糧收足而止如其鹽少貨多則其勢不能

不有折扣即使折扣過重而實數既已查清通照全數分攤票販眾目昭彰亦應帖然心服茲當開局之先合將辦理章程先行具稟

道光十七年十月海分司童濂稟淮北自改行票鹽以來納稅無不踴躍行銷更屬暢旺以是四方遠近之人聞風而至遞漸增多聚各販所攜之貨不下數百萬兩當初行之年以各販所攜之貨已足敷正額之數繼販眾貨多之後其到場有先後之不同若隨到隨收收足正額而止則後到之販勢必攜貨空返以故從前稟定限制令各販先投手本上號總其成數如果貨多於額即

行均勻折扣攤派嗣因法立弊生竟有無貲棍徒空上手本存賣後到未及上號之販兼有徒手營求專以賣號牟利者不遂所欲則浮言肆起怨毒叢生其票販誤買則成本加增因而虧折尤爲票販之害又復設法整頓稟定驗貲章程以期革除空本杜絕干求並思驗貲之法若同在一處則一日難周分作數日則一貲兩驗是以本年卑職會同總辦及場局各員分作五處同日驗貲驗畢之後當令攜回並不存庫乃後聞分派之處仍多空本未能核實來年章程擬請再爲變通由卑職先行出示曉諭來年二月初間開局屆期卑職督同場

局各員齊至分司衙門分局分日以半月爲限令票販
備具手本各自攜貲次第呈驗凡每日所驗之貲令票
販各將姓名籍貫並錠件分兩自於銀封之上填明封
固蓋用圖記標繫竹牌由委員登記號簿將貲暫寄庫
內統俟各局驗畢之後通計票販所驗之貲按較場鹽
派買之額如其數適相符卽另示期令票販各以寄庫
之貲分日上稅如所驗之貲浮於場鹽派買之數卽照
額均勻折扣以期人人有鹽可買如此則貲無虛數而
驗皆得實矣經鹽政陶澍批驗貲章程向未將銀收庫
以致仍有弊端今議卽將各販呈驗之貲暫寄庫內所

議極爲妥協應如稟辦理惟各販呈驗存庫之貨據議令各販自於銀封之上蓋用圖記以爲憑據似尙未爲盡善緣圖記一項非該販手書花押可比將來折對之時仍恐有戳記相同狡賴銀數多寡之弊今似不若於加蓋圖記之外仍飭各票販自著一押似可更昭周密卽由司飭行該分司會同總辦委員飭行場局各員暨示票販通知仍由該司酌核來年應發照票除本年存數外仍應發票若干預於年內印發以備開局後填用

道光十八年二月鹽政陶澍奏本年票鹽開局販情踊躍風聞攜貲到場者已有二百餘萬兩而票鹽額數奏明

以四十萬引內外爲率未便任聽多運或致侵灌淮南
見據該總辦分司等稟請驗貨挂號以引數扣合銀數
分別按折派買並因有驗貨無銀空投手本挂號希圖
轉賣獲利者深恐成本增重漸爲票法之害復經該總
辦分司等酌擬驗明實係有銀辦運卽令親自畫押收
銀存庫俟派號之後如果銀浮於引仍將餘銀發還臣
思票引有定而興販人多欲杜弊端舍此亦別無辦法
已飭行該總辦分司等破除情面妥協辦理仍飭總辦
委員海州直隸州知州王用賓及海州營參將德本常
川在浦督帶兵役彈壓俾資鎮靜

道光二十年海分司童濂稟淮北票鹽章程從前並不驗
貨因年來票貨過旺本年多至九百二十餘萬兩而歲
額銷鹽限於四十六萬引非折扣不能收稅非驗貨無
從折扣是以不得不出於驗貨而以驗過之貨儘數收
庫照折均攤上稅餘出之貨發還票販領回辦理一律
公平眾皆帖服本年五月內賀御史具奏淮北驗貨之
時正淮南奏銷之日一時累積銀千百萬兩悉赴淮北
驗貨而去遂至揚州銀短價昂雖重利無可借貸是驗
貨之法於淮北無毫髮之益而適掣淮南奏銷之肘等
語查淮南鹽課係於先一年三月開綱按卯陸續徵收

至次年二月奏銷俱已徵收齊全並非於奏銷時臨期
借貸奏辦淮北二月驗貨於淮南奏銷實無干涉惟既
稱驗貨於淮北無毫髮之益則驗貨應卽停止旣稱驗
貨適掣淮南之肘則開局應卽提前擬請淮北辛丑綱
徵收票鹽稅課停止驗貨並請提至本年十二月內開
局先於十二月初四日接收挂號手本按照所挂之號
限二十日分局分日將票販所納正雜稅課及經費鹽
價銀兩一併全數彈兌收庫如所收稅銀與歲額行銷
鹽數相符自無庸議儻或所徵稅銀仍多至數百餘萬
兩不能不均攤折扣而以收稅餘出之貲發還票販領

回緣開局雖不驗貨而折扣事非得已如不定立章程或竟准令票販認運或但隨到隨收錢糧收足而止非但弊端百出必致浮言肆起同時爭先擁擠更是無從截數經鹽政裕謙批准

道光二十年正月署鹽政麟慶示照得淮北鹽法改行票運經陶前部堂奏明每年以四十萬引內外爲率在前因票鹽暢行偶有續請之引遂致白手到場強求力索不滿所欲四起流言甚屬不成事體經陶部堂於道光十九年票鹽開局之時酌定全額號四十六萬引驗貨派買不准續增一引在案本部堂兼權督篆見在己亥

綱票鹽開局前據海分司具稟業經批飭仍查照上年定案於四十六萬引通攤分派之外不准續增一引以杜徒手到場求號轉賣之弊等情亦在案惟是利孔爭趨不免人懷希冀本部堂既兼鹺政保無有冒稱親友假託丁胥或陰向所屬干求或擬寫書函投遞人情詐僞不可不先事豫防除札行總辦委員及海分司嚴密查拏外合亟出示曉諭爲此示仰諸色人等知悉爾等挾本貿遷在所不禁如果攜貲呈驗按折派號本部堂原不與聞儻或妄事營謀希圖情號竟有假冒前項弊端該總辦分司等素知本部堂清慎自持毫無介紹爾

等一經請託定必立時拘留根究來歷將本人書札一併解齋來轅從嚴究辦決不稍事姑容須知開局驗貨按折派買既不續增一引本無餘號可求慎毋妄逞貪心致貽後悔也

道光二十八年四月戶部議覆兩江總督李星沅奏豫納戊申綱課銀一摺查淮北改引用票設局驗貨令民販領票運鹽向係外辦章程節經該督等隨時體察情形酌量妥辦並將協貼代納等銀六十七萬餘兩奏明全數歸入淮南以裕奏課各在案茲據兩江總督李星沅轉據鹽運司但明倫以票鹽暢行本年正月丁未綱開

局據各販呈報共銀八百三十餘萬兩鹽有定額不能加運實祇收銀八十九萬四千餘兩餘貲全行發還下屆仍須運集徒滋煩費且時在冬臘紋銀會集揚郡計須二三月之久於州縣辦漕商賈貿易銀路不無妨礙請於驗收丁未綱課款之外將戊申綱稅課豫納銀八十九萬四千餘兩一併兌收其餘給販領回並據該督批飭照辦將所收丁未戊申兩綱課銀按數存庫俟該綱奏銷屆期分別造報候撥各等語臣等詳核所奏係爲俯順販情免占銀路起見且稱業已批司照辦應准將兌收丁未及豫納戊申兩綱稅課共銀一百七十八

萬八千餘兩照數存庫仍俟該兩綱奏銷屆期造報候撥惟此項課賦係屬入奏正款應責成該督嚴飭局員迅速批解運庫加謹收存斷不得因所交銀兩奏銷尙早稍有通融借撥又啟虧挪之漸至該局驗費併收下一綱之課原爲體恤民販俾歸簡便但該販等豫納銀兩多至八九十萬計其壓擱息銀已及一年恐各販惟利是圖難保不勾串該局吏胥暗中弊混儻有藉票放斤情事不加禁絕則夾帶之鹽必逾額運之數勢將各處侵越莫可稽察近據山東山西各巡撫皆以淮北票鹽充斥致各該處引積商疲奏請調劑卽其明證相應

請

旨敕下該督悉心訪察全局通籌務令諸弊肅清免致顧此失彼於

國用仍無裨益奉

旨依議欽此

道光二十九年九月海分司洪上庠總辦童濂稟准北票鹽於道光二十七年併收丁未戊申兩綱稅課本年已西綱額運票鹽四十六萬引自七月二十七日開放雙金闌之後截至九月初六日已運出鹽三十六萬三千五百引下賸九萬餘引約計九月內俱可全數運壩鹽

既運竣卽應預籌下綱稅課查歷綱係年底或春初開局本年有奏明賑款銀三十萬兩必須早爲籌備以應要需卑職等公同商酌向來開局係聽各路民販攜貲投納取其衆擎易舉之意來年加添十萬引係偶因賑需暫加一綱未必因此壅滯惟票販總須令其有利可圖自當加意體恤查歷綱開局票販挾貲投納者至千萬之多大都出利借貸而鹽引有額不得不按引折派該販等得引無幾又復出貲購買他人上納之引湊辦謂之買號無非貪圖多得引數而成本則已加增今擬將庚戌綱之四十六萬引暫准已酉綱票販接辦一次

並將加添之十萬引按數加給各販承辦該販等既無須預防折扣認利多借銀兩投納且往年尙須出貲買號今有格外加給之引實於販情有裨即使下綱壩價稍落而成本業已減輕不致虧折見已派委角斜場大使萬啟彬試用鹽經歷溫紹原分途赴西壩板浦查驗各票販本綱大票原辦若干引造具清冊呈送一面發給卑職等另刊小票持赴揚州以爲納稅之據定於十月十五日仍在揚州察院署內開局至於票販接辦一綱係因籌賑加引暫行一次嗣後並不爲例免蹈淮南專商認引之弊經鹽政陸建瀛批前據運司面稟票

鹽驗貲於南商不無窒礙等語今據該丞稟稱本年票
鹽開局請將庚戌綱之四十六萬引暫准己酉綱票販
接辦一次並將加添之十萬引按數加給各販承辦等
情應卽准予暫行一次嗣後不得爲例致蹈專商壟斷
之弊

謹按咸豐初年軍興餉絀始議以鹽抵餉驗貲之法
未能舉行至同治年間北甌暢銷復有驗貲之事

同治七年九月海分司許寶書稟據票販福豫新等稟稱
查本年六月間開辦癸亥新綱陸續捆運到壩核計壩
銷已及三分之二見存鹽止二十餘萬包尙有本綱未

經運到臨浦等鹽約十餘萬包統計新綱存鹽不過四十萬包當此菜市旺銷之際止此存數僅足敷衍冬令開正以後必致無鹽應販若待來年開辦新綱相隔遙遙從中脫銷暗虧釐課抑或就此開辦則前綱未清後鹽糾葛固屬違礙定章而販等一綱之鹽未竣貲本難以收齊實無驗貲之巨款伏查本年癸亥綱驗貲一百五十萬兩折引不及十分之二掣派之後查無新販花名販等瘡痍甫脫勉力支持何得驟增本銀如許無非皆向銀販通融借貲助驗無人不存多多益善之心旬日之中計爲銀販賺去利金十餘萬兩費一年之經營

統一綱之餘利盡爲他人作嫁且有成本虧累者此販等適足自愚良深愧悔今幸蒙福庇本綱銷數尙暢藉此轉輸之迅速仰冀接續之補苴販等公同會議壩鹽存數旣少不得不預爲綢繆場垣積收無多又難以全綱掣派見查三場各垣餘鹽尙存十餘萬引足敷半綱之額擬懇先將下綱額引查照本綱實運花名引數接認一綱遵照定章每千引完納半課六百五十一兩連鹽營倉河等款三十兩共計六百八十一兩以全綱而計可得先徵課銀二十餘萬兩以濟大營凱撤及籌協東河工程一面委員查明各垣存鹽之戶先行掣派乘

此水勢趕捆到壩仍遵前案另行封堆應俟癸亥綱銷竣方准啟封出售明年春埽以後再按各垣掣派以符甲子一綱之額庶於定章不致違礙而場垣各商向於冬寒向販等預商接濟每因掣垣未定頗費調停有此提運鹽價場商亦得濟竈之資在販等本年受借貲之累早在洞鑒之中儻蒙俯如所稟則循環轉運免再借本等情卑職伏查各販等所稟本年癸亥綱驗貲一百五十萬兩折引不及十分之二此項貲銀皆向銀店通融借貸加息十餘萬兩利歸中飽販情益形虧折尙屬實在情形見在壩鹽存數無多似應預籌開辦甲子新

綱飭販運鹽儲棧以濟售銷而免脫誤可否仰祈憲慈
俯准癸亥綱各票販查照本綱實運花名引數接認一
綱免其驗貨遵章每千引完納正雜稅半課六百五十
一兩連鹽營倉河等項三十兩共計庫平銀六百八十
一兩以示體恤之處理合專肅稟祈鑒核示遵再查三
場各垣餘鹽尙存十餘萬引足敷半綱之額擬請先行
查明掣派飭販運壩濟銷餘俟明年春埽以後再按各
垣續收掣派以足甲子一綱額數合併聲明經鹽政馬
新貽批准北癸亥綱票鹽據稟壩銷已及三分之二統
計存鹽不過四十萬包僅敷今冬銷市開正以後深恐

無鹽應販自應預籌甲子新綱以免脫誤惟本年癸亥
綱驗貲流弊極大不特票販借貲認利成本加增其新
商得引之後率皆高擡引價賣號而不辦運甚有攜挾
厚貲專放重利旬日之間獲息數千兩者所稱利歸中
飽自係實在情形既據各票販稟請查照癸亥綱實運
花名引數接認下綱係仿淮南循環給運章程尙屬便
商可行本部堂與曾爵閣部堂面商應准免其驗貲卽
飭癸亥綱各舊販按照實運花名引數接認甲子綱正
額遵章每千引先納正雜課等項銀六百八十一兩將
三場餘鹽秉公掣派趁水趕運儲壩如有誤課誤運之

商應卽扣引另招以杜把持之弊餘悉照所議辦理

同治九年二月鹽政馬新貽奏查北鹺收效之捷全在刪
除溢引鹽無壅積之虞商獲轉輸之益惟鹽務向爲利
藪銷路一通往往趨之若鶩近年每值開綱轉苦商多
額少不得不驗明貲本減折派運而此中弊竇頗難枚
指臣前年蒞任時適值淮北開綱與曾國藩面商停止
驗貲旣就舊綱花名准其承運新綱試運年餘商情稱
便此次興修運河隄工各票販踴躍輸捐尤著成效見
經臣批定立案嗣後責成原運各販循環轉運以清弊
源而垂久遠奉

旨戶部知道欽此

同治十年六月鹽政曾國藩咨戶部查鹽務本是利藪新章有利可圖趨之若鶩商多額少遂有驗貲折派之法惟今昔情形不同從前富商巨賈各有專業攜貲赴驗者類多業鹺之商他人無所希冀今則官商營弁及富戶錢鋪人等一聞鹽務驗貲之信均挾巨貲呈驗迨經得引並不辦運輒卽重價賣號憑空漁利遂至得引者俱非辦鹽之人實在辦運者轉多不能得引是以癸亥綱起卽令前綱之商接運後綱見已仿辦四綱各票販於開綱之時卽將課銀先繳一半其餘隨售隨繳毫無

貽誤並在海分司衙門出具包課切結存案此後循環轉運按綱清完斷不致有虞蒂欠此體察驗貲必須停止之實情也戶部覆咨查淮北改行票鹽首議驗貲一節卽屬先課後鹽之法卽如長蘆引岸商人認辦之初先交銀兩寄庫以抵應完之款同一慎重課項係爲預防商販拖欠起見立法最爲周而惟來咨所稱今昔情形不同見在挾貲呈驗得引者俱非辦運之人實在辦運者轉不能得引等語自係實情其令前綱商人接辦後綱開綱時先繳一半課銀餘銀隨售隨繳辦法亦尙有把握但事關更張成法自應專摺奏明辦理以昭核

實並飭海州分司出具不致貽誤課款印結一併送部
再行查核

同治十一年十月署鹽政何璟奏查北鹺初改票法會定
驗貨章程軍興後鹺綱日壞並未舉行同治三年曾國
藩奏定淮北新章亦未議及驗貨厥後銷路漸通鹽利
較厚凡開綱之時遠近商販聞風爭趨額引祇有此數
不能不先驗貨本減折派運無如今昔情形不同從前
攜貨赴驗者不外業鹺之商近則錢鋪人等以及官紳
營弁不招自來人眾志紛流弊不可窮詰前督臣馬新
貽與曾國藩妥商停止驗貨卽就舊綱花名准其承運

新綱曾於癸亥綱造報摺內聲敘迨曾國藩回任兩江
又經縷晰咨部接准部復內稱令前綱商人接辦後綱
開綱時先繳一半課銀餘銀隨售隨繳辦法尙有把握
自應奏明辦理等語茲據運司方濬頤具詳請奏前來
臣查驗貨派引易啟賣號漁利之漸弊實實多經曾國
藩等商令停止飭令票販循環轉運已歷數年販情稱
便應完課銀均係年清年款絲毫無欠見又據各票販
出具不致誤課切結經海分司加具印結詳咨戶部以
後自宜按綱循環以垂久遠戶部議奏查淮北引鹽額
定二十九萬六千九百八十二引每引行鹽四百斤自

道光十三年改行票運銷路大暢旋又加徵溢課按年協貼淮南銀六十七萬兩並在板浦場設局驗貲每年開局令票販先納銀三四百萬兩至八九百萬兩不等除去應收鹽價票稅餘仍給還至道光二十八年丁未綱驗貲於本綱應納銀八十九萬四千餘兩外預納戊申一綱課銀名爲免令逐年赴驗實已前綱之商接辦後綱此實淮北初次改票徵收大概也迨咸豐三年辦理軍務北引滯銷就場徵稅與試辦餉鹽均無成效原任江督曾國藩於同治三年九月復請舉行票鹽先運正額二十九萬六千九百八十二引每引收正課銀一

兩五分一釐雜課銀二錢又外銷雜費銀四錢倉穀河
費鹽捕營各一分淮北正引四百斤分四包捆運並自
西壩出湖先在五河設卡每包收釐錢五百文運赴上
游再於正陽關設卡每包收釐錢五百文他卡祇准驗
票不准重抽定限一年奏銷此又淮北接續行票變通
章程也嗣後每屆奏銷均按一年核計惟同治九年馬
新貽奏報癸亥綱收數自同治七年六月十七日開徵
起扣至次年三月初九日止一綱銷竣計提早三箇月
又同治十年曾國藩奏報乙丑綱收數自同治九年三
月二十一日開徵起連閏扣至是年十二月二十一日

止一綱銷竣計提早兩箇月馬新貽摺內卽稱近日每
值開綱轉苦商多額少因請停止驗貲就舊商花名准
令承運新綱曾國藩又稱今昔情形不同從前富商巨
賈各有專業攜貲赴驗者類多業鹺之商今則官紳營
弁及富戶錢鋪人等一聞鹽務驗貲之信均挾巨貲呈
驗迫經得引並不辦運輒卽重價賣號憑空漁利遂致
得引者俱非辦鹽之人實在辦運者轉多不能得引請
仍令前商接運於開綱時將課銀先繳一半其餘隨售
隨繳當經臣部以淮北票鹽定章之始卽令驗貲先課
後鹽最有把握若先完半課餘銀俟其售完繳清難保

無誤課款至淮北銷數從前每年增至四十六萬餘引
自接辦己未綱後僅銷正額二十九萬有奇中間奏銷
年分尙積五綱尤應設法疏銷及時趲運俾清綱分而
復舊額行令該督妥議覆奏取具切結送部以憑核辦
各在案茲據前署督何璟具奏前來大致仍欲停止驗
貨令票販循環轉運並取具各票販切結海州分司加
結咨送前來臣等查送到印結內僅結稱按照正額引
數循環轉運每綱包完課銀不致貽誤於臣部責令趲
早綱分規復舊額之處並未議及且查循環轉運如按
照淮北舊章仍不能不查驗貨本道光二十七年丁未

一綱預納來年課款卽其確證溯查淮北改行票鹽創自原任兩江總督陶澍承綱引積弊之餘撤商招販所握要以圖者惟恃先課後鹽之一法今銷數尙絀於前商力未加於昔徒徇票販之欲停免驗貲將永守此二十九萬有奇之引額挨綱接運竊恐積引無日能銷舊額無時能復卽陸續完交之半課亦難保不有拖欠該省厯任督臣奏陳驗貲之弊亦甚詳盡惟停免以後利權全歸票販欲去一弊又生一弊於課額難期起色查票販均去來自便必先令入貲於官而後權自上操行之稍可持久所以山東行票地方令民販輸穀一擔領

引一道俾按綱接運兩浙近辦票綱亦令按引先捐塘
工經費卽准逢綱驗照接續辦運至淮北既有驗貲定
章又有完納預課成案今以驗貲易啟售賣空號之弊
計惟查照道光二十七年丁未綱成案令殷實票販於
開綱時先完全綱兩年課款並呈報真名的姓派引若
干填給引照俾資執守其預完來年課款卽永遠存儲
運庫嗣後逢綱驗照循環轉運祇令先課後鹽無須再
驗貲本如遇歇業查明辦運無誤卽將預課發還另招
領運其未能交納兩年課款之票販仍令逢綱驗貲不
在循環轉運之例如此辦法似於售賣空號之弊可以

漸除而每年完交課款亦有把握惟不將此項完納預課寄存局卡致啟挪移奉

旨依議欽此

互見循
環給運

同治十二年六月鹽運司方濬頤詳查淮北票鹽自前爵閣督鹽憲曾奏定新章先運正額定限一年奏銷始則先鹽後課繼自壬戌綱起飭販先繳半課餘銀售鹽完納數年以來販情稱便課項亦絲毫無誤嗣於癸亥綱辦理驗貨富商巨賈挾貨爭趨滬上洋商亦聞風麇集得引後賣號漁利流弊無窮蒙前督鹽憲馬會商前爵閣督鹽憲曾於甲子綱停止驗貨卽令舊綱各販循環

轉運並取具各販包課無誤切結由分司加結詳轉咨部各在案查此次部議以停免驗貲利權全歸票販先課後鹽方有把握仰見全局統籌慎重課項之至意茲據該販等議復情願於開綱時按照印收花名承運引數自己已綱起將全綱正課先行完納似於大部先課後鹽之議尙屬相符辦法既有把握販本亦不致占礙據請至己已綱起將全綱正課先行完納以符先課後鹽之議是否俯如所請伏乞示遵經鹽政李宗義批查閱部文議令票販完納兩年課款無非因票販去來自由故欲先令人貲於官殊不知淮北自定循環章程課

項年清年款且已具結咨部可免脫誤之慮既據各票
販等議稟願於開綱時將全綱正課先行完納核與部
文先課後鹽之議尙屬相符所稱己未至丁卯歷八年
有餘銷足九綱之數與帶銷無異亦係實情以後仍請
逐綱提前應准照辦仰卽督同海分司自己已綱起飭
令各票販於開綱時完全綱正課不得稍有短欠並候
奏報開綱聲敘附奏可也

兩淮鹽法志卷一百四